

Далайн захиргааны даргын 2019 оны 08 дугаар  
сарын 15-ны өдрийн 6 дугаар тушаалын хавсралт



**ДАЛАЙН ЗАХИРГААНЫ ХЭМЖЭЭНД ХӨДӨЛМӨРИЙН АЮУЛГҮЙ БАЙДАЛ,  
ЭРҮҮЛ АХҮЙН ГУРВАН ШАТНЫ ХЯНАЛТЫГ  
ЗОХИОН БАЙГУУЛАХ ЖУРАМ**

Нэг. Ерөнхий зүйл

1.1 Далайн захиргааны ажилтнуудын ажлын байрны нөхцөл, барилга байгууламж, машин механизм, тоног төхөөрөмж, тээвэрлэх механизмыг, аюултай тэсрэх дэлбэрэх бодис, галын аюулгүй байдал, ажлын тусгай хувцас, хамгаалах хэрэгсэлд тавигдах шаардлага хэрхэн хангагдаж байгааг шалгаж, зөрчил дутагдлыг цаг тухайд нь илрүүлэн арилгаж байх зорилгоор гурван шатны хяналтын ажлыг зохион байгуулахад энэхүү журмын зорилго оршино.

1.2 Гурван шатны хяналтыг тогтоосон хугацаанд нь тогтмол явуулж байх нь байгууллагын захиргаа, албан тушаалтан нараас хөдөлмөрийн аюулгүй байдал, эрүүл ахуйг хангах талаар хүлээсэн үүргээ биелүүлэх ажлын үндсэн арга хэлбэр юм.

1.3 Гурван шатны хяналтыг байгууллагын ажилтан, Хөдөлмөрийн аюулгүй байдал, эрүүл ахуйн зөвлөлийн болон Хяналт шинжилгээ, дотоод аудитын зөвлөлийн гишүүдийг оролцуулсан комисс хийнэ.

1.4 Гурван шатны хяналтын үр дүнг /илэрсэн зөрчил/ “ХАБЭА-н 3 шатны хяналтын дэвтэр”-т маягтын дагуу бичиж тэмдэглэнэ.

1.5 Байгууллагын бүтэц, ажлын онцлогтой уялдан дор дурдсан албан тушаалтнууд ХАБЭА-н гурван шатны хяналтыг хийх, зохион байгуулах үүрэг хүлээнэ. Үүнд:

- 1-р шатны хяналтыг ажилтан эсхүл ажил шууд удирдаж буй ажилтан;
- 2-р шатны хяналтыг ХАБЭА-н орон тооны бус Зөвлөлийн гишүүд
- 3-р шатны хяналтыг Байгууллагын даргын тушаалаар томилогдсон комисс

Хоёр. Нэгдүгээр шатны хяналт

2.1 Ажил гүйцэтгэж байгаа ажилтан эсхүл ажил шууд удирдаж буй ажилтан тус тусын хариуцсан ажлын байранд ажлын эхлэл ба ажлын явцын туршид аюулгүй ажиллагаа, хөдөлмөрийн нөхцөлийн байдалд ажил эхлэх бүрт хийх шалгалтыг анхан шатны хяналт гэнэ.

2.2 Ажилтан ажил эхлэхийн өмнө 15 минутаас багагүй хугацаагаар ажлын байрандаа эрсдэлийн хяналтын үзлэг хийж “ХАБЭА-н 3 шатны хяналт”-ын 1-р шатанд бичилт хийн илэрсэн зөрчлийг арилгах эсхүл удирдах албан тушаалтанд мэдэгдэх зэрэг тодорхой арга хэмжээ авсны дараа ажлаа эхлүүлнэ.

2.3 Нэгдүгээр шатны шалгалтаар дараах зүйлийг шалгана. Үүнд:

- a/ Урьд өмнө хийсэн хяналт шалгалтаар илэрсэн зөрчлийг арилгасан байдал;

- б/ Ажлын байран дахь багаж хэрэгсэл, сэлбэг хэрэгслийн эмх цэгц;
- в/ Машин тоног төхөөрөмжийн бүрэн бүтэн байдал;
- г/ Ажлын тусгай хувцас, хамгаалах хэрэгслийн бүрэн бүтэн байдал;
- д/ Машин тоног төхөөрөмжийн хөдөлгөөнт хэсгийн хаалт, хамгаалалт, аюултай бүс, орчинд байх хориглосон тэмдгийн бүрэн бүтэн байдал;
- е/ Дохиоллын системийн болон гал эсэргүүцэх багаж хэрэгслийн ажиллагааны найдвартай, бүрэн бүтэн байдал;
- ё/ Ажлын тусгай хувцас, аврах, хамгаалах хэрэгслийн бэлэн байдал;
- ж/ Ажлын байранд гүйцэтгэж буй ажил үүрэгтэй холбоотой аюулгүй ажиллагааны зааварчилгааны дүрэм, журам сахиж байгаа байдал;

2.4 Албан тушаалтан /ажилтан/ нь илэрсэн зөрчил дутагдлыг "ХАБЭА-н 3 шатны хяналтын дэвтэр"-ийн 1 дэх шатны хяналт гэсэн хэсэгт хүснэгтийн дагуу бичиж ажил удирдагчийн хяналтын дор зөрчлийг арилгах арга хэмжээ авна. Шалгалтаар илэрсэн зөрчлийг өөрсдийн хүчээр арилгах боломжгүй бол ажил удирдагч нь дээд шатныхаа албан тушаалтанд мэдээлнэ.

#### Гурав. Хоёрдугаар шатны хяналт

3.1 Байгууллагын ХАБЭА-н орон тооны бус зөвлөлийн гишүүд зөвлөлийн даргаас өгсөн үүрэг, чиглэлийн дагуу хөдөлмөрийн аюулгүй ажиллагаа, эрүүл ахуйн чиглэлээр хийх нарийвчилсан шалгалтыг хоёр дахь шатны хяналт гэнэ.

3.2 Хоёрдугаар шатны шалгалтаар дараах зүйлийг шалгана. Үүнд:

- а/ Энэхүү журмын 1.5-д заасан нэг ба хоёр дахь шатны хяналтыг чанартай хийсэн эсэх, урьд өмнө илэрсэн зөрчлийг арилгасан байдал, "ХАБЭА-н 3 шатны хяналтын дэвтэр"-ийн хөтлөлтийн чанар;
- б/ ХАБЭА-н талаар мөрдөгдөж буй тушаал заавар, журам, албан шаардлага, сэргэжилүүлэг, удирдах ажилтнаас өгсөн үүрэг даалгаврын хэрэгжилт;
- в/ Барилга байшин, техник, тоног төхөөрөмж, машин механизм, тээврийн хэрэгсэл, даралтат сав, цахилгааны эх үүсгэвэр, өргөх, зөөх, тээвэрлэх механизм стандарт, дүрмийн шаардлагыг хангаж байгаа, тэдгээр нь гэмтэлгүй хэвийн ажиллаж байгаа эсэх, төлөвлөгөөт засвар үйлчилгээг хийсэн байдал;
- г/ Усан замын тээврийн хяналтыг хэрэгжүүлж буй газруудад ашиглагдаж буй тэсэрч дэлбэрэх, галын аюултай бодис/материал/-ын хадгалалт аюулгүй ажиллагааны шаардлагыг хангасан байдал;
- д/ Тэсэрч дэлбэрэх аюул, хордлого, гал түймэр, шаталт гарах нөхцөл байдал үүсэх эрсдэлтэй эсэхийг хянаж магадлах арга ажиллагаа, хянах, дохиолох, сэргийлэх хэрэгсэл системүүдийн бүрэн бүтэн, найдвартай байдал;
- е/ Аюулгүй ажиллагааны зааварчилгаа өгч байгаа байдал, ажлын байранд аюулгүй ажиллагааны үнэлгээ хийсэн байдал;

ё/ Ажлын тусгай хувцас, хамгаалах хэрэгсэл, дохио, санамж, гар багажны бүрэн бүтэн байдал, зөв ашиглаж байгаа эсэх, тэдгээр нь стандартын шаардлагад нийцэж байгаа эсэх;

ж/ Ажлын байруудын эмх цэгц, ариун цэвэр, эрүүл ахуйн нөхцөл байдал, гэрэлтүүлэг, агааржуулалт, галын аюулгүйн хамгаалах, хянах, хэмжих хэрэгслийн бүрэн бүтэн байдал, баталгаажуулалт;

з/ Аюултай газрыг хааж, хамгаалж аюулгүйн тэмдэглэгээ тавьсан байдал;

к/ Ажилтны ажил, амралтын дэглэмийн хэрэгжилт, сахилга хариуцлагын байдал, хөдөлмөрийн аюулгүй ажиллагаатай холбоотой бусад асуудлууд;

3.3 Хоёр дахь шатны хяналт хийсэн албан тушаалтан нь илэрсэн зөрчил, дутагдлыг /хяналт, шалгалтын үед арилгах боломжгүй/ "ХАБЭА-н 3 шатны хяналтын дэвтэр"-ийн 2 дахь шатны хяналт гэсэн хэсэгт хүснэгтийн дагуу арилгуулах арга хэмжээ, арга зам, арилгах албан тушаалтан, хугацааг бичиж гарын үсэг зурна.

3.4 Хүний амь нас, эрүүл мэндэд аюул учруулж болзошгүй ноцтой зөрчил илэрсэн тохиолдолд ажлыг зогсоож, аюултай бүсээс ажилтныг гаргаж, зөрчлийг арилгах арга хэмжээг яаралтай авна.

#### Дөрөв. Гуравдугаар шатны хяналт

4.1 Байгууллага дээр мөрдөгдөж буй тушаал, шийдвэрийн дагуу байгууллагын ХАБЭА-н орон тооны бус зөвлөл, байгууллагын Хяналт шинжилгээ, дотоод аудитын зөвлөлийн гишүүдийг оролцуулсан комиссыг даргын тушаалаар томилон байгууллагын хэмжээнд хөдөлмөрийн аюулгүй байдал, эрүүл ахуйн ажилд сар, улиралд хийх шалгалтыг гурав дахь шатны хяналт гэнэ.

4.2 Гуравдугаар шатны шалгалтаар дараах зүйлийг шалгана. Үүнд:

а/ ХАБЭА-н 1, 2-р шатны үзлэгийг хугацаанд нь чанартай хийсэн эсэх, урьд өмнө нь илэрсэн зөрчлийг арилгасан байдал;

б/ ХАБЭА-н чиглэлээр гарсан дүрэм, журам, заавар, тушаалын хэрэгжилт;

в/ Барилга байгууламж, техник, тоног төхөөрөмж, машин механизм, тээврийн хэрэгсэл, даралтат сав, цахилгааны эх үүсгэвэр, өргөх, зөөх, тээвэрлэх механизмын техникийн байдал, арчлалт, засвар үйлчилгээ, паспортжуулалт, сорилт туршилт, техникийн бичиг баримт/карт/ хөтлөлт, аюулгүй ажиллагааны шаардлагын хангарт;

г/ ХАБЭА-н сургалт, аттестатчлал явуулсан эсэх, ажилтнуудад зааварчилгаа өгөх ажлын хэрэгжилт, чанар, ажилтны ур чадвар, мэдлэг, ХАБЭА-н зөв дадал соёлд суралцсан байдал;

д/ Хөдөлмөрийн аюулгүй байдал, эрүүл ахуйн орон тооны бус зөвлөлийн ажлын явц;

е/ Гар багаж хэрэгсэл, сэлбэг материал, шатах тослох материалын хадгалалт, хамгаалалт, ашиглалтын үеийн аюулгүй ажиллагаа;

ё/ Ажлын хувцас , хамгаалах хэрэгслийн хангарт, ашиглалт, чанар;

ж/ Ажилтнуудын ажил үүргийн хуваарилалт, цаг ашиглалт, ажил, амралтын дэглэмийг сахисан байдал;

з/ Ажлын байрны тохижилт, тав тухтай байдал, гэрэлтүүлэг, агааржуулалт, сөрөг нөлөөлөл үүссэн эсэх;

4.3 Гурав дахь шатны хяналт, шалгалт хийсэн комиссын бүрэлдэхүүн нь илэрсэн зөрчил, дутагдлыг "ХАБЭА-н 3 шатны хяналтын дэвтэр"-ийн 3 дахь шатны хяналт гэсэн хэсэгт хүснэгтийн дагуу арилгуулах арга хэмжээ, арга зам, арилгах албан тушаалтан, хугацааг бичиж гарын үсэг зурна. Зөрчлийг арилгах үүрэг авсан албан тушаалтан заасан хугацаанд нь зөрчлийг арилгаад "ХАБЭА-н 3 шатны хяналтын дэвтэр"-ийн зохих хүснэгтэд бичлэг хийж гарын үсэг зурна.

4.4 Гурав дахь шатны хяналт шалгалт хийсэн комиссын бүрэлдэхүүн илэрсэн зөрчлийн талаар акт үйлдэх ба биелэлтийг Даргын зөвлөлийн хурлаар авч хэлэлцэнэ.